

VENDIM
Nr.53, datë 21.1.2009

**PËR NGARKIMIN E MINISTRISË SË BRENDSHME PËR KRYERJEN E
PROCEDURAVE TË PROKURIMIT PUBLIK, NË EMËR DHE PËR LLOGARI TË
KRYEMINISTRISË, MINISTRIVE DHE INSTITUCIONEVE TË VARËSISË, PËR DISA
MALLRA E SHËRBIME**

Në mbështetje të nenit 100 të Kushtetutës, të pikës 3 të nenit 11 të ligjit nr.9643, datë 20.11.2006 “Për prokurimin publik”, të ndryshuar, dhe të shkronjës “b”, të pikës 2 të vendimit nr.1, datë 10.1.2007 të Këshillit të Ministrave “Për miratimin e rregullave të prokurimit publik”, të ndryshuar, me propozimin e Ministrit të Brendshëm, Këshilli i Ministrave

VENDOSI:

1. Ngarkimin e Ministrisë së Brendshme, si organ qendror blerës, për kryerjen e procedurave të prokurimit, në emër dhe për llogari të Kryeministrisë, ministrive, institucioneve në varësi të Kryeministrit e të ministrave të linjës, për blerjen e mallrave dhe të shërbimeve të poshtëshënuara:

- i) Blerje automjetesh;
- ii) Blerje karburanti;
- iii) Blerje materialesh kancelarie;
- iv) Blerje orendish dhe pajisjesh për mobilim zyrash;
- v) Abonim në shtyp;
- vi) Blerje materialesh të ndryshme për pastrim;
- vii) Blerje uniformash, veshmbathjesh dhe elementesh të tjera, përbërëse të tyre;
- viii) Blerje këpucësh;
- ix) Blerje pjesësh ndërrimi për automjete, për shërbimet profilaktike;
- x) Blerje tonerash;
- xi) Blerje pajisjesh elektronike dhe telekomunikacioni;
- xii) Shërbim gatimi dhe shpërndarje ushqimi;
- xiii) Sigurim automjetesh;
- xiv) Shërbim interneti dhe e-mail-i;
- xv) Shërbimi për ruajtje me roje private;
- xvi) Shërbim pastrimi;
- xvii) Shërbim lyerje ndërtesash.

2. Ministria e Brendshme të prokurojë fondin limit, të llogaritur si shumë e fondeve buxhetore, të miratuar për çdo institucion, për secilin nga mallrat dhe shërbimet e përmendura në pikën 1 të këtij vendimi.

3. Autoritetet kontraktore, institucionet e përmendura në pikën 1 të këtij vendimi, brenda datës 31 janar, të dërgojnë në Ministrinë e Brendshme, si organi qendror blerës, të dhënat, teknike e sasiore, dhe fondin përkatës, për çdo prokurim.

4. Organi qendror blerës ka këto detyra dhe përgjegjësi:

a) të zhvillojë procedurat për prokurimin e përqendruar të mallrave e të shërbimeve, sipas artikujve të përcaktuar në pikën 1 të këtij vendimi;

b) të bashkërendojë punën me autoritetet kontraktore për mbledhjen dhe përpunimin e të dhënave për prokurimet publike, që do të zhvillojë si organ qendror blerës;

c) të verifikojë përputhshmërinë e kërkesave të dërguara nga autoritetet kontraktore me ligjin dhe standardet në fuqi;

ç) të shqyrtojë dhe miratojë specifikimet teknike, të dërguara nga autoritetet kontraktore.

Nëse gjykohet se specifikimet teknike nuk janë përgatitur në përputhje me ligjin për

prokurimet publike ose mund të shkaktojnë dështim të procedurës së prokurimit, organi qendror blerës kryen rishikimin e specifikimeve teknike, në bashkëpunim me specialistët e fushave, të institucioneve përgjegjëse, ose specialistë të jashtëm, vendas a të huaj. Në këto raste organi qendror blerës vë në dijeni autoritetet kontraktore për ndryshimet e bëra;

d) të unifikojë specifikimet teknike, për mallra dhe shërbime të të njëjtit lloj, në përputhje me standardet e miratuara, në bashkëpunim me specialistët e fushave, të institucioneve përgjegjëse, ose specialistë të jashtëm, vendas a të huaj. Në këto raste organi qendror blerës vë në dijeni autoritetet kontraktore për ndryshimet e bëra.

dh) të bashkërendojë punën për testimin e tregut, për përllogaritjet e të dhënave sasiore për mallrat, që do të prokurohen, para publikimit të tenderit. Në këto raste organi qendror blerës vë në dijeni autoritetet kontraktore për ndryshimet e bëra;

e) të shqyrtojë ankesat e operatorëve ekonomikë deri në shpalljen e njoftimit të fituesit;

ë) të bashkëpunojë me Agjencinë e Prokurimit Publik, për mbarrëvajtjen e procedurave të prokurimit.

5. Organi qendror blerës, në raste përjashtimore, mund të zhvillojë procedurë prokurimi edhe kur kërkohet nga një autoritet a një grup autoritetesh kontraktore, që nuk janë përcaktuar në këtë vendim, apo edhe për mallra a shërbime, që nuk janë përcaktuar në këtë vendim.

6. Organi qendror blerës, në rast se autoritetet kontraktore kanë kërkesa, pasi është bërë publikimi i njoftimit të kontratës së prokurimit, verifikon arsyet e vonësës dhe vendos për shpalljen ose jo të procedurës së re të prokurimit për këto kërkesa.

7. Ngarkohet Agjencia e Prokurimit Publik të udhëzojë autoritetet kontraktuese për zbatimin e këtij vendimi.

8. Ngarkohen Ministria e Brendshme dhe institucionet e përmendura në pikën 1 të këtij vendimi për zbatimin e vendimit.

9. Vendimi nr.53, datë 16.1.2008 i Këshillit të Ministrave “Për ngarkimin e Ministrisë së Brendshme, për kryerjen e procedurave të prokurimit publik, për disa mallra dhe shërbime, në emër dhe për llogari të Kryeministrit, ministrive dhe institucioneve të varësisë”, shfuqizohet.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha